

## Maulidur Rasul Peringkat UMP Disambut Meriah



Pekan, 7 Januari- Lebih 500 orang staf Universiti Malaysia Pahang (UMP) berarak dan berselawat dari perkarangan Kompleks Pentadbiran Utama menuju ke Masjid UMP di Pusat Aktiviti Pelajar sejauh dua kilometer sambil memperingati pengorbanan Nabi Muhammad SAW dalam memperjuangkan syiar Islam.

Perarakan diketuai oleh Naib Canselor UMP, Profesor Dato' Dr. Daing Nasir Ibrahim bersama pihak pengurusan serta melibatkan 20 kontinjen daripada jabatan dan fakulti yang mengambil bahagian.

Hadir sama ahli Lembaga Pengarah Universiti, Syed Muhammad Hamzah Al-Junid Syed Abd. Rahman yang merupakan Ketua Pegawai Eksekutif UMP Holdings Sdn.Bhd, Timbalan Naib Canselor (Hal Ehwal Pelajar dan Alumni), Prof. Dato' Dr. Yuserrie Zainuddin, Pemangku Pendaftar, Abd. Rahman hj. Safie dan Pengarah Pusat Islam dan Pembangunan Insan (PIMPIN), Dr. Mahyuddin Ismail.



Program dianjurkan PIMPIN dengan kerjasama Pejabat Naib Canselor (PNC) dan Badan Kebajikan Staf Universiti (BKSU) yang bertujuan memperingati hari keputeraan Rasullallah SAW dan menghayati pengorbanan terhadap ummah serta mencontohi amalan baginda.

Profesor Dato' Dr. Daing Nasir berkata, walaupun kewajiban untuk mengingati junjungan agung kita, Nabi Muhammad S.A.W. tidaklah semata-mata terhad setiap kali tibanya ulang tahun tarikh keputeraan baginda iaitu pada setiap 12 Rabiul Awwal dalam kalendar Hijri.



Namun perhimpunan ini merupakan manifestasi iltizam dan tekad kita untuk mencontohi baginda dalam setiap lapangan kehidupan, selain ingatan yang berpanjangan terhadap baginda yang dilafazkan melalui selawat, salam dan doa pada setiap masa.

"Kita sesungguhnya amat bertuah kerana dilahirkan dalam agama fitrah ini dan amat beruntung kerana dipilih pula sebagai umat Nabi Muhammad S.A.W, penghulu sekalian Nabi dan Rasul. Justeru, sewajarnya kita mengambil pengajaran daripada riwayat hidup dan Sunnah yang dibawa oleh baginda, tidak hanya dalam kehidupan peribadi, tetapi juga dalam melunaskan kewajipan dan tanggungjawab kita sebagai penjawat awam di universiti ini," katanya.

Selain itu, beliau mengingatkan tentang kesatuan yang dilambangkan sama ada dalam kalangan staf mahupun mahasiswa sewajarnya berganding bahu dalam merealisasikan aspirasi dan agenda semasa Universiti ini yang bukan sahaja sebagai azam tahun baharu 2016, tetapi juga sebagai pemangkin kejayaan pelaksanaan Pelan Strategik UMP 2016-2020 yang akan dilancarkan tidak lama lagi.

Tambah beliau, tema 'Perpaduan Nadi Transformasi Negara' yang mendasari sambutan Maulidur Rasul kali ini perlu diterjemahkan secara menyeluruh dalam konteks kewajipan kita sebagai seorang penjawat awam di UMP untuk terus memberikan perkhidmatan yang terbaik kepada para pelanggan dan pemegang taruh.



Sementara itu Prof. Dato' Dr. Daing Nasir turut menyampaikan pemenang perarakan yang dimenangi Jabatan Bendahari di tempat pertama. Diikuti Jabatan Pendaftar di tempat kedua dan Jabatan Hal- Ehwal Pelajar dan Alumni (JHEPA) di tempat ketiga.

Turut dipilih sebagai pemenang adalah gabungan Jabatan Hal Ehwal Akademik dan Antarabangsa (JHEAA), Jabatan Jaringan Industri & Masyarakat (JJIM), Pejabat Antarabangsa (IO) dan Institut Pengajian Siswazah (IPS), pemenang seterusnya Pusat Bahasa Moden dan Sains Kemanusiaan (PBMSK) dan Jabatan Pembangunan dan Pengurusan Harta (JPPH). Majlis turut diserikan dengan ceramah yang disampaikan Habib Ali Zaenal Abidin Al-Hamid yang berkongsi cerita tentang tokoh kepimpinan junjungan besar Nabi Muhammad SAW.

**Disediakan Unit Perhubungan Awam, Bahagian Komunikasi Korporat PNC**

Posted By : NOR FADZILLAH BINTI ZULKIPLI Date Posted : 07-01-2016, 16:46:55